

საქართველო და ქართველები

ნიკოლა დე ფინის კვლევის ჩვენზე



გიორგი სორელი

საქართველო და ქართველები ნიკოლა დე ფერის კედლის რუკაზე

ავტორი და რედაქტორი: გიორგი სორდია
დიზაინი და დაკაბადონება: ნიკოლოზ ოსიპოვი



ეთნიკურობისა და მულტიკულტურალიზმის შესწავლის ცენტრი (CSEM) არის დამოუკიდებელი კვლევითი ინსტიტუტი, რომელიც სწავლობს ეთნო-პოლიტიკურ და კულტურულ პროცესებს, ეწევა საგანმანათლებლო და საკონსულტაციო საქმიანობას და ხელს უწყობს სამოქალაქო ცნობიერების ამაღლებას.

© გიორგი სორდია, 2021

© ეთნიკურობისა და მულტიკულტურალიზმის შესწავლის ცენტრი (CSEM), 2021

შინაარსი:

შესავალი	3
ნიკოლა დე ფერის აზიის კონტინენტის კედლის რუკა	4
საქართველოს და ქართველების გამოსახვა დე ფერის რუკაზე	6
ილუსტრაციები	9

შესავალი

გასული საუკუნეების ევროპელ გეოგრაფთა ნაშრომები მნიშვნელოვან და საინტერესო ცნობებს შეიცავს საქართველოს ისტორიის და ეთნოგრაფიის შესახებ. ამ თვალსაზრისით განსაკუთრებით აღსანიშნავია მდიდარი ევროპული კარტოგრაფიული მემკვიდრეობა, რომელიც ნათლად წარმოაჩენს საქართველოს ადგილს და როლს მსოფლიო ისტორიაში. ცალკეულ ევროპულ რუკებზე დაკვირვებით შესაძლებელია ვიმსჯელოთ იმაზე თუ საუკუნეების მანძილზე როგორი აღქმა გააჩნდა საქართველოს ევროპელთა თვალში, რამდენად მნიშვნელოვანი ქვეყანა იყო ის მათთვის და როგორ იცვლებოდა დამოკიდებულება საქართველოს მიმართ ზოგადი პოლიტიკური მდგომარეობის ცვლილებასთან ერთად. აღნიშნული რუკები უაღრესად საინტერესოა ასევე იმის გასარკვევად თუ რა სახელწოდებებით იყო ცნობილი ევროპაში საქართველოს ცალკეული რეგიონები, ქალაქები, სოფლები თუ სხვა დასახლებული პუნქტები.

ეთნიკურობისა და მულტიკულტურალიზმის შესწავლის ცენტრი საკუთარ საქმიანობაში დიდ ყურადღებას უთმობს ევროპული კარტოგრაფიული მემკვიდრეობის შესწავლას და დოკუმენტირებას, საქართველოსთვის და კავკასიისთვის მნიშვნელოვანი კარტოგრაფიული ნიმუშების მოძიებას. უკანასკნელი თვეების მანძილზე, ცენტრის მიერ არაერთი ასეთი იშვიათი და მანამდე ფართო საზოგადოებისათვის უცნობი რუკა იქნა გამოვლენილი და წარდგენილი დაინტერესებული აკადემიური საზოგადოებისათვის როგორც ონლაინ პუბლიკაციების¹, ასევე ბეჭდური პროდუქციის და ცენტრის ელექტრონული არქივის გასაჯაროების მეშვეობით².

ამჯერად წარმოგიდგენთ კიდევ ერთ, საქართველოში დღემდე გამოუქვეყნებელ და შეუსწავლელ ევროპულ კარტოგრაფიულ ნიმუშს, რომელიც საინტერესოდ წარმოაჩენს როგორც საქართველოს გეოგრაფიულ მდებარეობას, ასევე შეიცავს ცნობებს საქართველოს ცალკეული მხარეების ეთნოგრაფიის და ისტორიის შესახებ. რუკის მნიშვნელობას ზრდის ისიც, რომ მასზე აღბეჭდილია ქართველთა ყოფა-ცხოვრების ამსახველი რამდენიმე გრავიურა. საქმე ეხება მე-17 საუკუნის ცნობილი ფრანგი გეოგრაფის და კარტოგრაფის ნიკოლა დე ფერის (Nicolas de Fer) მიერ 1696 წელს გამოცემულ, დიდი ფორმატის კედლის რუკას აზიის კონტინენტის გამოსახულებით.

¹ ეთნიკურობისა და მულტიკულტურალიზმის შესწავლის ცენტრის ონლაინ პუბლიკაციები ხელმისაწვდომია ცენტრის ოფიციალურ ვებგვერდზე: <http://csem.ge/publications/>

² ეთნიკურობისა და მულტიკულტურალიზმის შესწავლის ცენტრის კარტოგრაფიული არქივის ნაწილი ხელმისაწვდომია ცენტრის flickr.com-ის ოფიციალურ გვერდზე: https://www.flickr.com/photos/csem_archives/albums

სანამ უშუალოდ აღნიშნული რუკის დეტალურ აღწერას და მასზე საქართველოს და ქართველების გამოსახვას შევხებით, მოკლედ გაგაცნობთ ნიკოლა დე ფერის (1640-1720) შემოქმედებას. დე ფერი მისი ეპოქის მნიშვნელოვან გეოგრაფად და კარტოგრაფად ითვლება. ის საგამომცემლო საქმიანობითაც იყო დაკავებული და ძირითადად გეოგრაფიული ხასიათის ლიტერატურის გამოცემას და გაყიდვას ეწეოდა. ეს პროფესია მან მემკვიდრეობით მიიღო მშობლებისაგან. მისი ხელმძღვანელობით საოჯახო გამომცემლობა და კარტოგრაფიული დაწესებულება იმდენად განვითარდა და გაიზარდა, რომ მალევე სამეფო კარის ყურადღებას მიიპყრო. 1690 წელს ის საფრანგეთის დოფინის ოფიციალური კარტოგრაფი გახდა. მოგვიანებით კი მას მიენიჭა ესანეთის მეფე ფილიპე V-ის და საფრანგეთის მეფე ლუი XIV-ის ოფიციალური კარტოგრაფის წოდება. ამას გარდა ის მჭიდრო კავშირში იმყოფებოდა საფრანგეთის მეცნიერებათა აკადემიასთან და სარგებლობდა იმ უახლესი ნაშრომებით, რომლებიც აკადემიის ფარგლებში იქმნებოდა. მისი რუკების უმეტესობას სწორედ ამის აღმნიშვნელი წარწერით არის გაფორმებული: „შედგენილია სამეფო მეცნიერებათა აკადემიის უახლესი აღმოჩენების მიხედვით“ (*Dressée sur les nouvelles observations de Messieurs de l'Académie Royale des Sciences*). დე ფერის კარტოგრაფიული მემკვიდრეობას შეადგენს ექვსასზე მეტ რუკას, რამდენიმე ატლასს, ასობით გრავიურას და ოცდაექვს კედლის რუკას. დე ფერის რუკები ასევე გამოყენებულია მისივე თანამედროვე გეოგრაფთა ნაშრომებში. აღსანიშნავია, რომ დე ფერის ატლასებიდან არაერთ რუკაზეა საქართველო გამოსახული, ამ თვალსაზრისით განსაკუთრებით თვალსაჩინოა დე ფერის აზიის და ევროპის კონტინენტების რუკები. ეს ნიმუშები დაინტერესებული ქართველი აკადემიური წრეებისათვის კარგად არის ცნობილი, მაგალითად დე ფერის რამდენიმე რუკა საქართველოს გამოსახულებით შესულია ქართველი ისტორიკოსების გიორგი ლობჯანიძის³ და ლაშა ბაქრაძის ნაშრომებში⁴.

ნიკოლა დე ფერის აზიის კონტინენტის კედლის რუკა

დე ფერის რუკებს შორის საქართველო ყველაზე ვრცლად და დეტალურად არის ასახული მის ერთ-ერთ იშვიათ რუკაზე, რომელიც აზიის კონტინენტს მოიცავს. რუკის დასახელებაა: „აზიის რუკა, რომელიც მოიცავს მის ძირითად მხარეებს, მონაცემები ეყრდნობა სამეფო მეცნიერებათა აკადემიის აღმოჩენებს. შედგენილია საფრანგეთის დოფინის გეოგრაფის ნიკოლა დე ფერის მიერ პარიზში“ (სრული ფრანგულენოვანი დასახელება: *L'Asie divisée selon letendu de*

³ გიორგი ლობჯანიძე. ევროპული რუკები და საისტორიო წყაროები საქართველოს შესახებ. XVI-XVIII სს. თბილისი, 2010

⁴ Lasha Bakradze. Georgia on Maps. Sulakauri Publishing, 2020

ses principales parties, et dont les points principaux sont placez sur les observations des Messieurs de l'Academie Royale des Sciences. Dressée par N, de Fer, Geographe de monsieur de Dauphin. A Paris chez l'auteur dans l'Isle du Palais, fur le Quay de l'Horloge, à la Sphere Royal. Avec le Privilege du Roy, 1696).

მნიშვნელოვანია აღინიშნოს, რომ ეს რუკა არ წარმოადგენს არც ერთი გეოგრაფიული ატლასის შემადგენელ ნაწილს, ის მომზადდა როგორც კედლის რუკა საფრანგეთის დოფინის საპატივცემულოდ. მსგავსი კედლის რუკები მასობრივად არ იწარმოებოდა, ისინი განკუთვნილი იყო მხოლოდ სამეფო კარის და უმაღლესი არისტოკრატის მოსახმარად. დე ფერის სახელს უკავშირდება სულ უცდაექსი კედლის რუკის გამოშვება. ერთ-ერთი პირველი მათგანი კი სწორედ წარმოდგენილი აზიის რუკაა, ამ სერიაში სულ ოთხი რუკა შედის - აზიის, ევროპის, ამერიკის და აფრიკის რუკები. ოთხივე რუკა მსგავსი სტრუქტურის მიხედვით არის შედგენილი, გამოირჩევა უაღრესად დახვეწილი დეკორატიული გაფორმებით და გეოგრაფიული ინფორმაციის სიუხვით. ოთხივე რუკა, არაერთი შეფასებით მიჩნეულია ფრანგული დეკორატიული კარტოგრაფიის შედეგად. ეს რუკები სულ რამდენიმე ეგზემპლარის სახით არის შემორჩენილი, მათ შორის საუკეთესო ნიმუშები კი დაცულია საფრანგეთის ეროვნულ ბიბლიოთეკაში. წარმოდგენილ პუბლიკაციაში ჩვენ სწორედ საფრანგეთის ეროვნულ ბიბლიოთეკაში დაცულ ერთ-ერთ ეგზემპლარს ვიყენებთ.

რუკა უჩვეულოდ დიდი ფორმატისაა (ზომა: 114 x 165 სმ), დაბეჭდილია ოთხ ფურცელზე (იხ. სურ. 1), კონტინენტის რუკა განთავსებულია ცენტრალურ ნაწილში, რომლის გარშემოც, ოთხივე მხარეს განთავსებულია დეკორატიული გაფორმებები და გრავიურები აზიის სხვადასხვა ხალხთა გამოსახულებებით. თავის მხრივ ამ გამოსახულებებს ახლავს მცირე განმარტებითი ტექსტები წარმოდგენილი ხალხების შესახებ. რუკაზე დატანილია გრავიურები შემდეგი ხალხების გამოსახულებებით: ჩინელები, იაპონელები, თურქები, ინდოელები, თათრები, ფილიპინელები, წყნარი და ინდოეთის ოკეანის კუნძულოვანი ქვეყნების ხალხები, მონღოლები, სომხები, ქართველები, იმერლები, მეგრელები. ამას გარდა, რუკის მარკვენა, მარცხენა და ქვედა მხარეებზე დატოვებულია ვრცელი ადგილი გეოგრაფიული აღწერისათვის. კერძოდ, წარმოდგენილია ძირითადი გეოგრაფიული ინფორმაცია აზიის კონტინენტის შესახებ: ძირითადი მდინარეები, ქალაქები, კონცხები, ტბები და სახელმწიფოები.

რუკაზე ასახული ინფორმაცია და გეოგრაფიული თუ ეთნოგრაფიული მონაცემები თავად დე ფერის მიერაა შედგენილი მისთვის ხე-

ლმისაწვდომ ფრანგულ წყაროებზე დაყრდნობით. გრავიურებს რაც შეეხება, დე ფერის დიზიანის მიხედვით შესრულებულია ჰოლანდიელი გრავიორის და მხატვრის ჰენდრიკ ვან ლუნის (Hendrik van Loon) მიერ. აღსანიშნავია, რომ ეს რუკა მოგვიანებით, 1760-იან წლებში გამოსცა კიდევ ერთმა ცნობილმა ფრანგმა კარტოგრაფმა ლუი ჩარლზ დესნოსმა (1725-1805).

საქართველოს და ქართველების გამოსახვა დე ფერის რუკაზე

რუკაზე საქართველოს და ქართველების შესახებ ინფორმაცია ასახულია როგორც კარტოგრაფიულ ნაწილში, ასევე დეკორატიულ გაფორმებებში. ისევე როგორც ამ ეპოქის რუკების უმრავლესობაზე, წარმოდგენულ რუკაზეც საქართველო აღნიშნულია ორმაგი სახელწოდებით Georgie და Gurgistan (გეორგიე, გურგისტანი/გურჯისტანი). ქვეყნის აღმნიშვნელი ეს სახელწოდება რუკაზე მთავრული ასეობით ადგილს იკავებს შავ და კასპიის ზღვებს შორის მდებარე ცენტრალურ ტერიტორიაზე. შედარებით მომცრო შრიფტით კი აღნიშნულია საქართველოს ცალკეული რეგიონები: Abaza (აფხაზეთი), Mingrelie (სამეგრელო), Gurie (გურია), Imirette (იმერეთი), Baratralu (სამხრეთ-დასავლეთ საქართველო, სახელწოდება „სათაბაგოდან“ უნდა მომდინარეობდეს), Carduel (ქართლი). დასახლებულ პუნქტებს შორის გამოყოფილია: Cotatis (ქუთაისი), Teflis (თბილისი), Cori (გორი), Scanda (სკანდა), Zagen (ძეგამი). რუკაზე ასევე დატანილია ორი მდინარე, დასავლეთ საქართველოში მდინარე Fasso (ფაზისი/რიონი), აღმოსავლეთ საქართველოში კი Kur (მტკვარი). (იხ. სურ. 2).

რუკის მარცხენა მხარეს განთავსებულ აზიის კონტინენტის აღწერილობით ტექსტში ასევე გვხვდება მცირე მონაკვეთი საქართველოს შესახებ, რომლის მიხედვითაც „გეორგიე“ ანუ „გურგისტანი“ არის ქვეყანა, რომელიც შედგება შემდეგი მხარეებისგან: სამეგრელო, ქართლი, გურია, იმერეთი. აზიის კონტინენტის ძირითადი ქალაქების ჩამონათვალში კი ადგილს იკავებს საქართველოს შემდეგი ქალაქები: ქუთაისი, თბილისი და ძეგამი.

რუკაზე განსაკუთრებით საინტერესოა დეკორატიული გაფორმების ნაწილი, რომლის ქვედა, ცენტრალურ მონაკვეთში წარმოდგენილია გრავიურები ქართველთა გამოსახულებით და დამატებითი ტექსტუალური ინფორმაცია ქართველთა შესახებ. უფრო კონკრეტულად, რუკის ამ ნაწილში დახასიათებული არიან ქართველები, იმერლები და მეგრელები შესაბამისი ილუსტრაციებითურთ. ზოგადად ქართველთა სამივე ამ ჯგუფის შესახებ აღნიშნულია, რომ გამოირჩევიან ფიზიკური სილამაზით, ამ თვალსაზრისით განსაკუთრებულად ხაზგასმულია

ქართველი ქალების სილამაზეზე, მამაკაცებს ახასიათებთ ბრძოლი-სუნარიანობა, თუმცა ცნობილი არიან თავიანთი უხეშობით. ავტორი აღნიშნავს ასევე ნაკლოვან მხარეებსაც, მაგალითად მეგრელების შესახებ წერს, რომ მიდრეკილნი არიან ქურდობისაკენ, სამეგრელოს მთავრები კი ეწევნიან საკუთარი ყმების გაყიდვას. ეს ჩანაწერი ამავე ეპოქის არაერთი ევროპელი ავტორის თუ მოგზაურის მიერ არის გადმოცემული და ასახავს საქართველოში გავრცელებულ „ტყვეთა სყიდვის“ პრაქტიკას. ადამიანებით ვაჭრობის ეს მანკიერი გამოცდილება რუკაზე ასახულია სამეგრელოს საილუსტრაციო გრაფიურაზე (იხ. სურ. 3), რომელზეც ჩანს ნავში მოთავსებული და გასაყიდად გამზადებული ყმები და მათი ბატონი. რუკაზე საქართველოს აღწერისას რამდენიმე ადგილას ნახსენებია მეღვინეობის კულტურის განვითარების შესახებაც. გლეხების მიერ ყურძნის კრეფის სცენა კი გამოყენებულია იმერეთის რეგიონის საილუსტრაციოდ (იხ. სურ. 4).


რუკაზე დატანილ გრაფიურებს შორის განსაკუთრებულ ინტერესს იწვევს ქართველების ამსახველი ორი ნახატი. ერთზე გამოსახულია სარკეში მოცქირალი ქართველი ქალი (იხ. სურ. 5), როგორც ნიმუში ქართველთა სილამაზისა. მეორეზე კი აღბეჭდილი არიან ქართველი მოლაშქრეები, რომლებიც იერუსალიმში შედიან მაღლა აღმართული დროშით (იხ. სურ. 6). ამ გამოსახულებას ახლავს განმარტებაც, როლის მიხედვითაც იერუსალიმში დროშებით შესვლა ქართველთა პრივილეგიაა. ნახატზე ქართველების მიერ აღმართულ ეროვნულ დროშაზე კი წმინდა გიორგია გამოსახული. რუკის მომზადების მომენტისათვის იერუსალიმში ქართველთა უფლებები უკვე მნიშვნელოვნად იყო შეზღუდული, თუმცა მე-13 საუკუნიდან მოყოლებული არაერთი ევროპელი ავტორი იმეორებს იერუსალიმში ქართველთა შესვლის პრივილეგირებული უფლების შესახებ. სავარაუდოა, რომ დე ფერი რუკაზე მუშაობის დროს ეყრდნობა მისივე თანამედროვე ფრანგ გეოგრაფებს. კერძოდ, რუკის გამოცემამდე რამდენიმე წლით ადრე ქართველთა დასახასიათებლად იგივე ფაქტი ყავთ მოყვანილი ფრანგ გეოგრაფებს პიერ დიუვალს (1619-1683) და ფეროტე დე ლა კრუას (1640-1715)⁵.

წარმოდგენილ რუკაზე საქართველოს გეოგრაფიული გამოსახვა სიზუსტით არ გამოირჩევა, თუმცა ის ევროპულ კარტოგრაფიულ ქმნილებებს შორის უთუოდ გამორჩეულ ნიმუშად უნდა ჩაითვალოს.

⁵ ორივე ავტორის ნაშრომები უდიდესი პოპულარობით სარგებლობდა მე-17 და მე-18 საუკუნეების ევროპაში. პიერ დიუვალის „მსოფლიო გეოგრაფია“ (Pierre Duval. Geographie Universelle) 1660-1688 წლებში ექვსჯერ იქნა გამოცემული. დე ლა კრუას „გეოგრაფიის შესწავლის ახალი მეთოდი“ (Antoine Phérotée de La Croix. Nouvelle méthode pour apprendre la géographie universelle) კი 1690-1717 წლებში სამჯერ გამოიცა. ორივე ნაშრომი მნიშვნელოვან ცნობებს შეიცავს საქართველოს გეოგრაფიის და ეთნოგრაფიის შესახებ.

ჩვენს მიერ მოძიებულ ევროპულ რუკებს შორის ის ერთადერთია, რომელზეც ქვეყნის გეოგრაფიული მდებარეობის გარდა ასახულია ქართველთა ეთნოგრაფიასთან და ყოფა-ცხოვრებასთან დაკავშირებული სცენები. მხედველობაში მოსაღებია ის გარემოებაც, რომ წარმოდგენილი რუკა შექმნილია საფრანგეთის სამეფო არისტოკრატიისათვის, ის გამოფენილი იყო სამეფო სასახლეებსა და ძირითად აკადემიურ დაწესებულებებში. შესაბამისად ფრანგული პოლიტიკური და აკადემიური წრეებისათვის ის წარმოადგენდა საქართველოს შესახებ პირველადი ინფორმაციის მოპოვებისათვის მნიშვნელოვან პირველწყაროს.

ილუსტრაციები




Source gallica.bnf.fr / Bibliothèque nationale de France

სურ. 1 ნოკოლა დე ფერის აზიის რუკა (მთლიანი გამოსახულება) - La Bibliotheque Nationale de France



სურ. 2 საქართველო ნიკოლა დე ფერის აზიის რუკაზე (ფრაგმენტი)
 - La Bibliotheque Nationale de France



LES MINGRELIENS.
*Sont Beaux bien faits et leurs
 femmes. extrêmement Belles
 mais tous Larrons Impudi-
 ques, yvrognes, Sale, puants,
 et tres mauvais Chrestiens
 Schimastiques.*
*E. Les Princes vendent
 leurs sujets, les sujets ven-
 dent leurs Domestiques et
 même leurs propres Enfants,
 qu'est le seul cammerce de
 cette malheureuse nation dont
 les Esclaves sont les plus esti-
 mes chez les Mahometans.*
*E. Lors qu'il veulent adop-
 ter quelques uns ces leur
 maniere de donner le bout
 du teton a sucer.*

სურ. 3 ადამიანებით ვაჭრობის სცენა სამეგრელოში - გრავიურა ნიკოლა დე ფერის აზიის რუკაზე (ფრაგმენტი) - La Bibliotheque Nationale de France



LES IMIRETTES, Sortent toutapeu p
 blabefaux Mingreliens. Il ny a guere de p
 lent plus mal qu'eux. G. Ils fouillent leurs Ra
 Troncs d'Arbres creüez et garde leur vin
 Terre enterrées chez eux ou a la campagne
 Chasse de Loyseau; les grands seigneurs de ce
 a leurs ceintures un Couteau, une Pierre à
 trois Bourses dans les quelles il y a du
 des Alaines, du Fil, et des Equilles.

სურ. 4 ყურძნის კრეფის სცენა იმერეთში - გრავიურა ნიკოლა დე ფერის აზიის რუკაზე (ფრაგმენტი - La Bibliotheque Nationale de France)



სურ. 5 ქართველი ქალი - გრავიურა ნიკოლა დე ფერის აზიის რუკაზე (ფრაგმენტი) - La Bibliotheque Nationale de France



სურ. 6 ქართველთა შესვლა იერუსალიმში გაშლილი დროშით, რომელზეც გამოსახულია წმინდა გიორგი (ფრაგმენტი) - La Bibliotheque Nationale de France